

咱 ê 最高忠誠？

我就照 chiah-ê 一切 ê 話，對猶大王西底家講：「Tiòh kā lín ê 領頸掛巴比倫王 ê 枷擔，來 kā 伊 kah 伊 ê 人民服事，chiah 會得 tiòh 活。（《全民台語聖經》耶利米書 27：12）

Tú 親像我 ê 小說《虎頭蜂巢》（The Hornet's Nest）所寫 ê，tī 美國獨立戰爭 ê 時，有一 koá 殖民地 ê 居民感覺真 oh 得去 thèh 起武器。In 一生 lóng 是英國國民，若是反叛，tòh 是違反 in 對國王效忠 ê 誓言。

Tī 美國內戰 ê 時 mā 全款，一 koá 真誠 ê 北方人認為只有寬鬆 ê 縛帶 chiah 有法度 kā 各州結聯做伙。In 認為每一州 lóng 有主權，而且相信中央政府無權利 kā 無需要 ê 律法強加 tī in 身上。

久長以來，我想講咱民選 ê 高級官員是 teh 講越南戰爭 ê 真相；只有當我成做州長 ê 時，我 chiah 開始知影美國人民一直是 teh hông 誤導。我 ê 大 kiá<sup>n</sup>—傑克（Jack）認為美國徵兵制度無公平，因為任何人若 ē-tàng 進入大學，in tòh ē-tàng 避免徵兵。伊按照原則，退學，然後去越南服兵役。Tī 衝突 ê 中間，人必須決定 in beh kā in ê 忠誠 khng tī tó 位。

上帝叫耶利米去命令以色列 ê 領導者接受巴比倫 ê 主權統治；he 是真少人 ài beh 聽 ê 消息。因為忠實傳達上帝 ê 信息，耶利米 hō 真 chē 以色列人認為伊是一個 lám 腳數、叛徒 kah 假先知。

當馬丁·路德·金恩（Martin Luther King Jr.）譴責種族隔離 ê 時，mā 發生全款 ê 情形。伊被掠 koh hông 關監，而且真 chē 南方 ê 白人認為伊是一個共產黨員 kah 反叛者。總是，不管壓倒性 ê 反對，金恩博士 iáu 是保持伊 ê 信念，koh 繼續按照伊 ê 信仰 teh 行動。

咱 lóng 必須做困難 ê 選擇；有時甚至是 tī 咱 ê 社會聲望 kah 對上帝忠誠之間做出選擇；咱 mā 必須 tī 和平 kah 戰爭、公義 kah 偏見、寬諒 kah 仇恨之間做出選擇。願咱 tiā<sup>n</sup>-tiā<sup>n</sup> 跟 tòe 耶利米 ê 模範，咱 tiòh 來選擇耶穌 ê 話！

**祈禱：**上主 ah，我知耶利米是「帶來 phái<sup>n</sup> 消息 ê 人」，而且 he 是祢 ê 信息—是為 tiòh 祢 ê 選民 ê 幸福。我 mā 有一個信息，是我 ê 救主—耶穌基督 hō 我 ê，所以，求祢幫助我來忠實履行。求祢赦免我 ê 罪，koh tī 基督 ê 疼內面 kā 我 kah 其他 ê 信徒結聯做伙。我 án-ne 懇求是奉我 ê 救主 ê 名。阿們。

（1997.07.06）